

晉記卷十八

列傳

蕭山郭倫撰

宗室諸王列傳

安平獻王孚

彭城穆王權

高密文獻王泰

范陽康王綏

濟南惠王遂

譙剛王遜

高陽王睦

任城景王陵

安平獻王孚字叔達宣帝次弟也性通恕好學不倦初爲魏臨淄侯植文學掾植負才陵傲孚每切諫初不合後乃謝之遷中書郎給事常侍宿省內出爲河內典農賜爵關內侯初魏文帝置度支尚書專掌軍

國支計及明帝卽位欲用孚。問左右曰：有兄風不？左右曰：似兄。明帝曰：吾得司馬懿二人，復何憂哉？轉度支尚書。孚以擒敵制勝，宜有備豫。諸葛亮入關中，邊兵不能制。中軍奔赴，輒不及事機。當豫選步騎二萬，分二部爲備。又以關中連遭兵寇，穀帛不足，遣冀州農丁屯上邽，凡五千人。秋冬習戰，春夏修田桑。由是關中軍國有餘。進爵昌平亭侯，遷尚書令，太傅懿誅曹爽。孚與司馬師屯司馬門，論功進長社縣侯，加侍中。魏明悼后崩，議書銘旌。或欲去姓而書魏。或欲兩書。孚以爲經典正義，皆不應書。凡帝王皆因本國之

名。以爲天下之號。與往代相別耳。非爲擇美名。以自
光也。天稱皇。天則帝。稱皇帝。地稱后。土則后。稱皇后。
此乃所以同天地之大號。流無二之尊名。不待稱國
號。以自表。不俟稱民族。以自彰。是以春秋隱公三年。
經曰。三月庚戌。天王崩。尊而稱天。不曰周王者。所以
殊乎列國之君也。八月庚辰。宋公和卒。書國稱名。所
以異乎天王也。襄公十五年。經曰。劉夏逆王后於齊。
不云逆周王后。姜氏者。所以異乎列國之夫人也。至
乎列國。則曰夫人。姜氏。至自齊。又曰紀伯姬卒。書國
稱姓。此所以異乎天王后也。由此考之。尊稱皇帝。赫

赫無二。何待於魏乎。尊稱皇后。彰以諡號。何待於姓乎。議者欲書魏者。此以天皇之尊。同於往古列國之君也。或欲書姓者。此爲天皇之后。同於往古之夫人也。乖經典之大義。非所以垂訓將來。爲萬世不易之式也。遂從孚議。遷司空代王凌爲太尉。成濟弑魏帝。百官莫敢奔赴。孚枕尸於股。哭之慟。曰。殺陛下者。臣之罪也。奏推主者。會太后令以庶人禮葬。孚與羣公上表乞以王禮葬。從之。孚性至慎。太傅執政。恆自退損。後逢廢立之際。未嘗預謀。景文二帝以孚屬尊。不敢逼。尋進長樂公。武帝受禪。陳畱王出就金墉。孚拜。

辭執王手流涕。歔歔不自勝。曰。臣死之日。固大魏之
純臣也。進孚太傅。詔曰。太傅勲德宏茂。朕所瞻仰。以
光導宏訓。鎮靜宇內。願奉以不臣之禮。其封爲安平
王。邑四萬戶。拜太宰。有司奏諸王未之國者。不置官
屬。帝尊孚。遂備置官屬焉。又以孚內有親戚。外有交
游。惠下之費。而經用不豐。特奉絹二千匹。元會。詔孚
乘輿上殿。帝於祚階迎拜。旣坐。帝親奉觴上壽。如家
人禮。帝每拜孚。跪而止之。又給雲母輦。青蓋車。孚雖
見尊寵。不以爲榮。常有憂色。臨終遺令曰。有魏貞士。
河內溫縣司馬孚。字叔達。不伊不周。不夷不惠。立身

行道終始。若一。當以素棺單槨。斂以時服。泰始八年。薨。年九十三。帝於太極東堂。舉哀三日。詔曰。王勳德超世。尊寵無二。期頤在位。朕之所倚。庶永百齡。諮仰訓導。奄忽殂隕。哀慕感切。其以東園溫明祕器朝服一具。衣一襲。緋練百匹。絹布各五百匹。錢百萬。穀千斛。以供喪事。諸所施行。皆依漢東平獻王蒼故事。其家遵孚遺旨。所給器物。一不施用。帝再臨喪。親拜。盡哀。及葬。又幸都亭。望柩而拜。哀動左右。給鑾輅輕車。介士虎賁百人。吉凶導從二十餘人。前後鼓吹。配饗太廟。九子。邕。望。輔。翼。晃。瓌。珪。衡。景。邕。初爲世子。先孚。

卒邕子崇爲世孫。又卒。泰始九年立崇弟平陽侯隆爲安平王。立四年。咸寧三年薨。無子。國絕。

義陽成王望出繼伯父朗。寬厚有父風。初舉孝廉。歷平陽太守。從太傅懿擊王凌。封永安亭侯。魏主髦好學。望與裴秀王沈鍾會竝見親待。數侍筵宴。魏主性急。秀等居內職。急召便至。以望外官。特給追鋒車一乘。虎賁五人。時景文相繼輔政。權歸晉室。望雖見寵待。而內不自安。求出爲征西將軍。持節都督雍涼二州諸軍。在任八年。威化明肅。進封順陽侯。徵拜衛將軍。武帝卽位。封義陽王。邑萬戶。給兵二千人。泰始三

年進位太尉。七年薨。年六十七。望性儉而好聚斂。身
亡之後。金帛盈溢。以此獲譏。四子奕、洪、整、樾。奕至黃
門郎。先望卒。整亦早亡。以奕子奇襲爵。奇亦好蓄聚。
遣三部使商貨交廣。爲有司所奏。太康九年。詔貶爲
三縱亭侯。更以章武王威爲望嗣。威誅。復奇爲棘陽
王。以嗣望。

洪仕魏。歷武原太守。封襄賁男。泰始初。封河間王。立
十二年薨。是爲平王。二子威、混。威嗣。徙封章武。其後
威繼義陽王望。更立混爲洪嗣。混薨。洛陽陷。諸子皆
沒於胡。而少子滔。初嗣新蔡王確。後得南還。與新蔡

太妃不協。太興二年。上疏以兄弟竝沒在遼東。章武國絕。宜還所生。太妃訟之。事下太常。太常賀循議曰。章武新蔡。俱承一國不絕之統。義不得替其本宗。而先後旁親。按滔旣已被命爲人後矣。必須無復兄弟。本國永絕。然後得還所生。今兄弟在遠。不得言無道。里雖阻。復非絕域。且鮮卑恭命。信使不絕。自宜詔下遼東。依劉羣盧諶等例。發遣令還。繼嗣本封。滔今未得便委離所後也。元帝詔曰。滔雖出養。自有所生母。新蔡太妃相待甚薄。滔執意如此。如其不聽。終當紛紜。更爲不可。今順其所執。遠襲章武。滔薨。子休嗣。休

與彭城王雄俱奔蘇峻。峻平，休戰死。弟珍，年八歲，以小弗坐。咸和六年，襲爵。珍薨，無嗣。河間王欽以子範之繼。薨，子秀嗣。義熙元初，爲桂陽太守。秀妻桓振之妹也。振反，秀不自安，謀反，伏誅。國除。威初嗣。洪，咸寧三年，徙封章武。太康九年，嗣封義陽。威性凶暴，諂附趙王倫。倫將篡，使威與黃門郎駱休逼帝奪璽綬。倫以爲中書令。倫誅，惠帝呼威，小字曰阿皮，捩吾指奪璽綬，不可不殺。遂誅威。

整早卒，有子邁。武帝追封整於隨，是爲穆王。邁嗣。太康九年，以義陽之平林益邁，爲隨郡王。

楸初封樂陵亭侯。泰始初，封東平王，邑三千九十七戶。入爲尚書，曲事楊駿。駿誅，依法當死。東安公繇與楸善，弗坐也。遷大鴻臚，加侍中。汝南王亮執政，遣楸就國。趙王倫篡，召楸爲衛將軍。倫誅，免官，尋出爲平東將軍，都督徐州，鎮下邳。蕩陰之役，東海王越奔下邳，楸不納。惠帝西遷，越率關東諸侯將迎車駕。楸懼，長史王修說楸以徐州讓越，自領兖州。惠帝遣使者劉虔，卽拜楸爲兖州刺史。楸在州，徵求不已，下不堪命。范陽王虓徙楸都督青州，楸不受命。虓遣將擊破之，走還國。帝還洛陽，楸乃詣闕。永嘉初，改封竟陵王。

東海王出牧豫州。畱世子毗及其黨何倫、伺察宮省。楸合衆襲倫，不克，奔竄獲免。洛陽陷，爲亂兵所殺。輔初爲野王太守，泰始初封渤海王，邑五千三百七十九戶。二年之國，咸寧三年徙封太原。太康五年薨，是爲成王。子宏立，元康中徙封中邱王。三年薨，子鑠立。

翼在魏爲虎賁中郎將，早卒。泰始初，以兄邕支子承爲嗣，封南宮縣王。承薨，子祐嗣。

晃，魏西安男。泰始初封下邳王，邑五千一百七十六戶。二年就國。晃性孝友，虛謙下士。九年拜尙書，遷右

僕射惠帝卽位爲車騎將軍加散騎常侍尋守尙書
令遷司空元康六年薨是爲獻王二子裒裒哀早卒
裒有篤疾別封良城縣王以太原王輔三子韓爲嗣
早薨子韶立

瓌在魏封固始子泰始初封太原王邑五千四百九
十六戶二年就國十年薨諡曰烈王子顥立徙封河
間別有傳

珪魏滇陽子泰始初封高陽王邑五千五百七十戶
六年入朝以父孚年高乞畱供養拜尙書遷右僕射
十年薨是爲元王無子詔以太原王輔子緝襲爵是

爲哀王。哀王立五年。咸寧四年薨。又無子。太康二年。詔以太原烈王世子顥子訟爲緝後。封眞定縣侯。衡。魏汝陽子。泰始初封常山王。邑三千七百九十戶。二年薨。無子。以安平世子邕四子敦爲嗣。

景。魏樂安亭侯。泰始初封沛王。邑三千四百戶。立十一年。咸寧元年薨。諡曰順王。子韜立。

彭城穆王。攢。宣帝弟。魏東武城侯。馯之子也。泰始初。封彭城王。邑二千九百戶。咸寧元年薨。子元王植立。增封萬五千戶。薨。子康王釋立。薨。子雄立。坐奔蘇峻。伏誅。更以釋子紘嗣。

紘初封唐邑縣公。建興末，元帝承制，以紘繼高密王據雄之誅也。紘入繼本宗，有風疾，性理不恆。著杜門，賦感康中，拜光祿大夫，領大宗師。後疾甚，或攻劫官寺，乘車突入端門，至太極殿前。於是御史中丞車灌奏劾，請免紘官。下其國，嚴加防錄。成帝詔曰：「王以明德懋親，居宗師之重，宜敷道養德，靜一其操，而頃游行煩數，冒履風塵，宜令官屬已下，各以職奉衛，不得令王復有此勞。」內外職司各慎其局。王可解常侍、光祿宗師，先所給車牛可錄取，賜米布牀帳，以養疾。咸康八年薨。二子：元俊、元嗣立。薨。子宏之立。薨。子邵立。

薨子崇之立。薨子緝之立。晉亡國除。俊出嗣高密王。略薨。諡恭王。子敬王純之立。薨子怱之立。晉亡國除。高密文獻王泰。彭城王權之弟也。魏陽亭侯泰始初。封隴西王。出爲兗州刺史。遷安西將軍。都督關中。永熙初。代石鑒爲司空。尋遷太尉。守尙書令。改封高密王。邑萬戶。元康九年薨。追贈太傅。泰性廉靜。不近聲色。雖爲宰輔。食大國之租。服飾肴膳。如布衣寒士。任真簡率。每朝會。不識者不知其王公也。事親恭謹。居喪哀戚。謙虛下物。當時諸王。惟泰及下邳王晃。以節制見稱。其餘莫得而竝焉。泰四子。越。騰。略。模。越別有

傳騰出後叔父弟略立

略字元簡孝敬下士有父風元康初侍愍懷於東宮出爲青州刺史愷令劉根起兵東萊衆以萬數攻略於臨淄略不能距走保聊城懷帝卽位遷都督荊州京兆流人王逌與叟人郝洛聚衆數千屯冠軍略使參軍崔曠左司馬曹攄擊之將戰而曠不赴攄獨戰而死略復使部將韓松攻逌逌降加散騎常侍永嘉三年薨是爲孝王子據立薨無子以彭城康王子絃嗣其後絃歸本宗立絃子俊以奉其祀

騰初封東嬴公出爲并州刺史惠帝討成都王六軍